



**SIUMUT
INATSISARTUT**

26. august 2014

UKA 2014/101

Inatsisartut Sulieriaasianni § 33 naapertorlugu, matumuuna aalajangiiffigisassatut siunnersuut saqqummiuppara:

Imartami sillimaniarnerup, umiarsuarnik nalunaarsuinerup, inatsiseqarnerup il.il. tamakkiisumik oqartussaaffigineqalersinnaaneri pillugit Naalakkersuisut UPA2015-mi nassuaammik saqqummiussinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Saxtorph Didriksen, Siumut)

Tunngavilersuut:

Kalaallit nunatta imartai tassaapput inunnik usinillu assartuiffiusut, imarpillu ikaarlugu nunarput nioqqutissanik pilersorneqarluni. Taamaattorli aamma taanngitsoorsinnaanngilara imartavut tassaammata annertuumik aalisartoqarfiusut.

Ilanngullugu maluginiagassaavoq naalagaaffik nunatsinni inissisimasumik imaatigut angallannermut, aalisariuteqarnermut isumannaallisaanermullu ingerlatsisumik immikkoortortaqarfegarnera.

Oqartussaaffiit namminersorneq pillugu isumalioqatigiissitap isumaliutissiissutaani sukumiinerusumik naalagaaffimmut isumaqtiginninniareernikkut tiguneqarsinnaasutut suliassaqarfittut II-tut allattorsimapput.

Tamanna namminersorneq pillugu inatsisip nassuaatitaani Imaani isumanaallisaaneq-mik qulequtaqartumi (allattugaq II, nr. 20), tassani imaani isumannaallisaanermi inatsimmi umiarsuit assigiinngitsut sannaat, atortui ingerlanneqarnerilu pillugit maleruagassat aalajangersarneqarput; taamattaarlu umiarsuarni sulinermi atugassaritaasut, umiarsuaatileqatigiit umiarsuillu naalagaasa akisussaaffii, umiarsuit aallaqqusaajunnaartarneri, sulifeqarfiit umiarsuarnik aalajangersaasartut, umiarsuit uuttortarneqartarnerat, allagartalerneqartarnerat kiisalu nakkutiliinerit aqtsinerillu. Taamattaarlu oqartussaasoqarfiiit ajutoortoqartillugu misissuisartut, imaan angallannermi malittarisassat il.il. kiisalu inuttaqarnermut piginnaasanik piumasaqaatit il.il. umiarsuarnut, inutanut il.il..

Immikkoortup taassuma nunarsuarmioqatigiinnut atuuttunut annertuumik malittarisassaqartinneqarnera naliginnaasuuvvoq, taakkulu atuutsinneqarnerat nunami malittarisassiornikkut isumagineqartarpoq.

Ilanngullugulu namminersorneq pillugu inatsisip nassuaatitaani umiarsuit nalunaarsorneqartarnerat imaanilu inatsisinut il.il. tunngasunut allassimavoq, oqartussaaffit umiarsuarnut umiarsuaatileqatigiiffinnut il.il. tunngasut oqartussaaffeqarfimmi aamma pineqartut (allattorsimaffik II, nr. 21), tassungalu ilanngullugit qularnaveeqquisutinut uppermarsaatit, akisussaaffit, umiarsuarnik sillimmasiinerit kiisalu assartuussinernut isumaqatigiissutit. Taamattaarlu oqartussaaffeqarfimmi aamma pisortanut kiisalu sulianik ingerlatsinerni apeqqutit ilaapput, tassunga ilanngullugit umiarsuit sorliit danskit erfalasuannik erfalasoqarsinnaaneri, eqqartuussivikkoortumik nassuaateqarneq il.il. kiisalu umiarsuaatileqatigii nunani allani oqartussaasunut attaveqarnerat il.il.

Isumaqarpunga sulissutigilertariaqarippuk tamakkiisumik tamakkununnga aqutsiveqalernissarput. Inuaqatigiuvugummi imartatsinnik misilittagaqarluartut atuilluartullu. Tassami qangarsuaaniilli qajaannarnik umiaannarnillu siulitta nunarput siamarfigisimavaat, allaammi ullumikkut Kalaallit Nunaata kitaata annersaa inoqarfeqalersimalluni.

Nunatsinni imartatsinnut aqutsiveqalernitsigut nunatta inuisa ilisimasaat atorluaneqarsinnaalissavagut, imaanimi angallannermi maleruagassat eqqarsaatigalugit tamakkua ilisimasat pitsangorsaanermut atorluarneqarsinnaagamik.

Ilisimavara imartamik atuinermut nunarsuarmioqatigii malittarisassaqarnerat. Aqutsiveqarfeqalerutta nunarput nammineerluni toqqaannartumik nunarsuarmi isumaqatigiissusiortarnernut akuusinnaalissaq, taamaalillatalu ilisimasavut aamma iluaqutigisinnaassallutigit. Imartamut aqutsiveqarfik tassaavoq imartani imarsiortunullu tunngaviusumik isumannaatsumik angalanissamut suliaqartartoq. Uagut kalaallit tassaavugut inuaqatigii imartatta iluliaqartarnera sermersuarmiillu uukkaasartoqarfeqarnera, minnerunngitsumillu aamma nunatta kangiata imartaaniit sikorsuit kitaanut uiartarneri eqqarsaatigalugit ingerlatsilernissamut ilisimasanillu avitseqateqarnissamut ajukkunnaateqanngitsut.

Siunnersuutip nunatsinni imarsiorerup inuaqatigiinnut iluaqutinngortinnissaa siunertarimmagu oqallilluarnissarput neriuutigaara.

Siunnersuutip aningaasatigut allaffissornikkullu pisortanut kinguneqaatissai
Nassuaammik saqqummiussassamik suliaqarneq allaffissornikkut aningaasartuutaanissaa naatsorsuutigineqarpoq, tamanna ukiup affaanik sulinermik naleqassaaq (250.000 kr. missaani).

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai
Soqanngilaq.